



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 3

Stoinis ODI asaya nungi
anisüngzüker

Sorkari ajak senteper ajak
renloktsü atema inyaker: Modi



VOL. XXII ISSUE NO. 114 (ADOK 114)

DIMAPUR ROGONÜ (FRIDAY)

TSÜKLAI (FEBRUARY) 07, 2025

₹ 5.00

BJP-i ozü MLA tem alizüktsü meranger: Kejriwal

New Delhi, Tsüklai/February 06 (Agencies): Delhi election osang sangdongtsü anogo ishika lia, BJP lenirtemi AAP candidate 16 den tongtepratepa parnok BJP nung denra sen crore 15 den minister menden agütsütsü ashi, ta Aam Aadmi Party-i ashi.

AAP lenir Arvind Kejriwal-i exit poll result tem magizüker aser itemji BJP ajanga taila survey agiba lir ta ashir.

"Agency kari tashiyim amshiba party yagi menden 55 dak tema angur ta sayur. Tesüiba ghonda ana tsüngta ozü candidate 16 dang call süa parnoki AAP yutsür par party (BJP) nung denra parnok minister kumdahtsütsü aser nisung shia nem sen crore 15 agütsütsü shiogo. Iba party ya menden 55 dak tema angur asünungbo, ozü candidates dangi call asütsü kechi nüngdak ali? Item taila survey temi candidate kar temulung ajemdahtsütsü nükjidadong nung tensa bener arutsür. Saka nenok tashiyim amshiba nisungtem, ozü nisung kata malangtsü," ta Kejriwal-i social media sapang X nung

lemsatöp.

AAP ajanga iba ama tai tongloktsüba ya tang mezüng masü. Kejriwal-i 2014 aser 2022 elections nunga iba mesük jembia BJP-i par den toktepba party nungi MLA tem nem sen crore 20 agütsütsü ashir ta tai tonglokja liasü.

Pollster timba nung exit polls agiba nung BJP ya küm 27 sülen Delhi nung maneni meyipa shilangtsü amai sayur. Exit poll nung Congress-i menden kata mangutsü amai takzür.

Axis My India exit poll nung AAP yagi menden 15 aser 25 tsüngta angutsü aser BJP+ yagi 45-55 menden angutsü aser Congress-i menden ka tashi angutsü amai sayur.

Chanakya Strategies exit poll ajanga AAP menden 25-28, BJP+ menden 39-44 aser Congress menden 2-3 angutsü amai asadangteter.

CNX exit poll nungbo AAP yagi menden 10-19, BJP+ menden 49-61 aser Congress menden 0-1 angutsü amai sayur.

Züngsem 70 aliba Delhi assembly election indang vote ya February 8 nü azüngtsü.

East Dimapur nung Deobarnü dokan shibangtsü

Dimapur, Tsüklai/February 06 (TYO): East Dimapur Town Council ajanga East Dimapur town kübok aliba shishilempar, dokan nung amener aser commercial establishments ajunga dang sangdong ka nung tang nungi tenzüka Deobarnü dokan aser stores ajunga shibangtsü metetdahtsüogo.

Ajisiüaka Bakeries aser Hotels tem iba talenba küboki maittsü aser akhi ama lapoktsü akok. Anungji shishilempar, dokan nung amener ajunga dang iba totuyuba sülen shidak anidaktsü ajungshir. Iba totuyuba sülen shidak anidaker asü masü ta meita aotsü aser aibelener nem tapet temerenshi agütsütsü, ta EDTC sangdong ajangasa ashi.

Assam CM kinungtsü-i SC lawyer anema ken o benok

Guwahati, Tsüklai/February 06 (Agencies): Assam Chief Minister Himanta Biswa Sarma kinungtsü Riniki Bhuyan Sarma-i Supreme Court lawyer aser activist Upamanyu Hazarika aser dangar trok anema criminal defamation case benok, koba ozüng tsütsü tokteptsü mali aser par anemer ola madokdahtsütsü merangba lir ta Hazarika-i ashi.

Iba defamation case ya Hazarika-i January 24 nü Guwahati nung osangbener senden ka nung jembidang, Kaliabor-Tinali nungi National Highway 715 (NH-715) Kuwaritol, Hatbor, aser Jakhalabandha ajanga belener aoba yagi Riniki Bhuyan Sarma meyong media company Pride East Entertainment Pvt. Ltd. dang ajangzüktsü, ta ashi.

Ken o indang osang nung langzüdang Hazarika-i pa tangatetba jangja sangdong ka agütsü. "Ni jaokba mesüra ni anema ken o benokba copy kata ni mangu, saka iba ken o ya NH-715 belener aoba dak sendakba nung ni osangbener senden ka nung jembiba indang mesüker. Iba ken o ya Jakhalabandha nung alirtemi Gauhati High Court nung

Public Interest Litigation (PIL) benoka asadangba mapang lir," ta pai ashi.

Iba defamation case ya tamendak dak maka, kechiaser ni jembiba nung official records tejangja lir, ta Hazarika-i ashi.

Iba lenmang yanglutsü aliba chichiba tesem nungi belener aoba ajanga Riniki Bhuyan Sarma meyong ali ajangzüktsü aser iba highway lenmang melenshitsü telemtetba ya Public Workd Department ajanga agi, koba la kinungbo Chief Minister-i repranger, ta pai tuteta ashi.

"NH-715 melener aoba ajanga Kuwaritol, Hatbor aser Jakhalabandha nung aliba nüburtem dak kanga mejungi akoksatsü, shirnok highway traffic dak metaloker alir. Iba ken o ya ni aser item tesem nung alirtem asoshi nokdakertem merenshitsü merangba dang lir. Iba amala yagi ni temulung ajema malitsü," ta Hazarika-i ashi.

Ken o nung Minu Saikia aser Pradeep Laskar tenüng amshiba ajanga highway belenba anema PIL benokba nung tenüng agüja alirtem ola madokdahtsütsü merangba sayur, ta Hazarika-i ashi.

Modi aser Amit Shah asen tsükchir lir: JeM

New Delhi, Tsüklai/February 06 (Agencies): Pakistan-occupied Kashmir nung sentong ka alidang Lashkar-e-Taiba aser Palestine nunger telungpur telok, Hamas den sapang ka nungi Jaish-e-Mohammed (JeM) ajanga Ato Kilonser Narendra Modi aser Union Home Minister Amit Shah ya par tsükchir lir ta sangdong.

Iba sentong indang video ka kanga bulua prokshia India nung agency balala saksalemdaktsür. Iba video nung JeM lenir ya Kashmir asoshi raratsü indang jembiba angashi.

It dangiterba agency temi ashiba agi, Pakistan indang Inter-Services Intelligence (ISI) yagi Hamas ya JeM den külemi Kashmir asoshi raradaktsüner. JeM, Lashkar-e-Taiba (LeT) aser

Hamas telok ya Pakistan-occupied Kashmir (PoK) kübok Rawalako nung sentong ka nung külemi shilem agia liasü. Iba sentong jembidang Jaish lenir yagi Kashmir atema külemi rarar aser Modi aser Shah ya parnok tsükchir lir ta ashiba angashi.

It dangiter osang kati Hamas ya Jaish aser Lashkar den teka amtepogo ta ashi. Video nungya Jaish nisungtem prangbong amer sapang nung Hamas lenirtem nüka liasü, ta parnoki ashi.

Ibai region indang security tsütsü tebilemtsü tulu lir ta parnoki ashir. Item telok tsüngta tesendaktep lira par tasa nung temelenshi aruba sayur alitsü, aser akhi mapang nungi parnoki ranglokba alema oa operations agitsü akok, ta ashi.

Osang ajangasa iba ama

lungjemba ajanga South Asia nung tensa tamajungba akumtsü, talisa J&K nung cross-border terrorism tali akumtsü, ta itdangiter temi ashir.

Ibai alima security asoshia tebilemtsü lir, kechiaser item telok yagi agi mapang nungi civilian dak tenük yokba aser kanga sashia amakba otsü lir. Pakistan nung JeM aser LeT ama telok balala jenokdahtsür aser yarir ta tai tonglokja arur, ta ashi.

Hamas ya tangbo PoK nunga lir asünungbo, Pakistan-i maneni telungpur inyaksangshi nung shilem agiba sayur. Hamas ya akhi mapang nungi Israel-Palestine rara nung rangloker arur, saka taoba mapang south Asian telungpur telok den osangtsüsang agitepba osangtem lir, ta parnoki ashi.

Naga nunger entrepreneurs nem timtem agütsür azüokang: DALT

Dimapur, Tsüklai/February 06 (TYO): Külem Lotha Naga entrepreneur ka anema NSCN-K (Khango) telok nungi züngsem temi tasü mait mapa inyaka February 4, 2025 nü tashiyim amshia sen meshiba khukhua aitsür, ta Dimapur Ao Lanur Telungjem (DALT) sangdong ka ajanga ashi.

Iba ama tesempatsü aketba inyakyim yagi meranga inyaker takum amokmerenba kisüng masü saka Naga nunger dak entrepreneurship aser pei sasa pei poksünga alitsüba tanüla samadaktsür.

Iba ama yimjak nung akmesen makai amokmerenba Dimapur Lotha Youth Organisation (DLYO) ajanga

aitsüba nung onoka dena lir. Telok balalai tanen makai local entrepreneurs dak tenük yokba ya khenyongi magizükteter aser tangsa anentsüla, ta DALT sangdong ajanga ashi.

Linük tenzüker tenüng amer item telok ya terenlok asoshi metsüdakba long ang kumogo, aser bendanga agütsür inyaka tang ang ajungketba entrepreneurs tem nokdanga asen state nung rongsenketzüng terenlok tsütsü shilem agiba soiter.

Onoki Ceasefire Monitoring Cell dang NSCK-K (Khango) telok azüoktsü aser tarutsü nung iba ama mapa tamajung meinyaktsü asoshi tekeraba nung mera tajung agitsü ajungshir. Ceasefire maparen shidak

inyaktsü asünungbo, Ceasefire Ground Rules sülen telok balala shidak anidaktsüla aser ozüng alema inyaksangshiba, talisa asen nübur dang tashiyim amshia senotsü meshiba aser merenshiba anentsüla.

Iba ama tim masüba mapa inyakdang DALT ajem-ajema malitsü. Bendanga agütsür meranga inyaka asen lokti ajungkettsü merangba Naga entrepreneurs ajunga den onok nokdaka lir ta nenshia metetdahtsür. Ano ochi bilemba nübur aser lokti tentet balala dang iba ama tasa tamajung anema ola adoktsü ayongzüker. Iba ama pei sünütsü asüba nungi asen nübur kumzüka ayutsü akhanger, ta DALT sangdong ajangasa ashi.

Anti-conversion law anema Arunachal Christian Forum-i longkak aittsü

Itanagar, Tsüklai/February 06 (Agencies): Bharatiya Janata Party (BJP) sorkari küm 46 tain anti-conversion law benoktsü asoshi mera agiba anema Arunachal Pradesh nung Khristanpur tentet tuluba, Arunachal Christian Forum (ACF) ajanga yimya balala nung longkak aittsü sentong sangdongogo.

Küm aika mamshi ayuba Arunachal Pradesh Freedom of Religion Act of 1978 sorkari amshitsü telemtetba agiba anema longkak ya aittsü ta ashir.

February 10 nungi tenüka ACF züngsem temi hopta ka tepiyong lumitsü aser iba sülen iba Act agientsü asoshi lokti sarasadem agia jajatsü.

Iba longkak aitba ya March 6

nü züngsem 60 aliba State Assembly sapanga tembangtsü, kechiaser iba Act mapa kuma inyaktsü asoshi jembitsü imlar.

Gauhati High Court-i September 2024 nungi tenzüka ita trok tsüngta draft rules tatem kuma yanglushitsü totuyuba agütsüba sülen December 2024 nung Chief Minister Pema Khandu-i Freedom of Religion Act ya amshitsü ta sangdonga liasü.

ACF tir Tarh Miri-i iba Act nung tebilemtsü akaba lemsatepdang, "Iba Act tenüng nung 'freedom' lir, saka asenoki tamangba yimsü balala amshiba azüoktsüsa iba Act ya yanglua lir," ta ashi.

ACF-i tebilemtsü akaba nung sorkari süoki ia magiba aser taoba

mapang Chief Secretary aser Chief Minister den senden amenba nung telangzüba magütsüba atema Miri-i sorkar aittsü. Sorkar inyakyim ya secularism tanüla anema lir, ta pai ashi.

Chief Minister P.K. Thungon-i aniba Janata Party sorkar kübok 1978 küm agizükba Arunachal Pradesh Freedom of Religion Act nükjidadong ya tashiyim, mesüzüka mesüra ashikülaka tamangba yimsü melendaktsüba nokdangtsü asoshi liasü.

Iba ozüng ya state nung lisopur tamangba yimsü nung timtem ajurutsü ta angatetba mechi yanglu, saka iba sülen sorkar balala melentepa yimsü süa arudang mapa kuma meinyaki senzüka yutsü.

Changtongya nung Marketing Shed ka lapok



Changtongya, Tsüklai 6, 2025: Changtongya yimtsüung nung Rural Development FY 2023-2024 kübok yangluba shishilembaba semtu ka BDO RD Block Changtongya I. Imnamar Jamir-i Tsüklai 6 anepdang lapoktsüa liasü. Sentong nung jembidang pai ashiba agi Nagaland nung RD Block aika lir saka iba scheme ya block ajak nungbo marur.

Anungji aluyimertemi iba semtu timi amshia rongsenkettsüung nung ajangzüktetba tesem ka kümdaktsütsü ayongzüik. Paisa iba semtu asüba maparen nung ketdangser Imlinungsang ajanga senotsü ochi shia amshiba ajanga yimlaba dang nungi kanga agi tajungba renemtetba atema pelar ta shia liasü.

Kasa sentong nung Changtongya Kosasanger

Putu Menden Chairman Tiasunep-i iba temoatsü yimtsüung nüburtem nem bener arutsüba asoshi RD department, Minister aser ketdangsertem dang pelaba shisema. Tianenla Lemtur ajanga sentong lemsa aser sentong tenzüka aser tembanga Rev C. Manen aser Pastor Rongsen ajanga sarasadem.

Mokokchung District DCLSC senden ka menogo

Dimapur, Tsüklai/February 6 (TYO): Mokokchung District Committee for Lighthouse School Complexes (DCLSC) senden ka February 5 nü Deputy Commissioner Conference hall nung menogo.

Mokokchung, Deputy Commissioner aser DCLSC mendenbuba Thsuvisie Phoji-i senden nung shilem agirtem pelashishia agizük aser iba project indang tongmelang agi metetdakja liasü.

Deputy Project Director NEP-The Lighthouse NECTAR Avelu Ruho NCS-i, senden nung shilem agirtem dang, state nung project koda benoka odor,

Lighthouse project & World Bank partnership, project nung keta alibatem, LSCs (From L1 to L4) atema shimshiyim amala metetdakja liasü.

Laisa, DCLSC indang shilem aser khuret tem lemsatap aser parnok dang SDEO/EAC convenor sür committee ka tentettsü mepeshia liasü.

Senden nungsa contractor, M/s Infra Project Pvt. Ltd indang metetdaktsü. Construction aser Grevance Redress Mechanism (GRM), atema ketdangsürtem, department, lokti tentet balala aser Stakeholders temi parnok tebilemtsütem Online (From the

project Website) mesür Offline (From DEO office through District Project Assistant, NECTAR or Site Engineer NECTAR) ajanga benoktetsü.

Sensaksem agiba mapang, züngsemtemi electricity capacity, tzü connection aser lokti-i koda shilem agitetsü iba indang jembia aser sentong nung shilem agirtem aser züngsemtem dang iba project nongita yaritsü aser talisa, file tem parnok office ajanga yoktsü aliba mapang teyari agütsütsü ajungshia liasü.

Senden ya Deputy Commissioner-i tepela o jembiba sülen tembanga liasü.

Dimapur aser Chümoukedima DPDB senden ayonger

Dimapur, Tsüklai/February 6 (TYO): Itashia amenba Dimapur District Planning and Development Board (DPDB) senden February 11 nü 11:00 ako nungi tenzüka DC Conference Hall, Dimapur nung amentsü ta metetdaktsüogo.

Senden nung züngsem ajak tamakok maludaktsüi arua shilem agitsü metetdaktsüogo.

Kasa mapang nung Chümoukedima Deputy Commissioner aser DPDB Vice Chairman Polan John-i sangdong ka ajanga February ita

atema Chümoukedima district, District Planning and Development Board (DPDB) senden February 10 nü 11 ako nungi tenzüka DC Conference Hall nung amentsü ta metetdaktsüogo.

DC-isa, iba senden nung züngsem ajaki jangrabangra arua shilem agitsü mepeshia metetdaktsüogo, kechiyong senden nung taruba itatem nung district terenlok atema maparen balala benoka inyaktsü asoshi ken o balala aika benoka sensak asemtsü lir, ta ashi.

Nagaland State Bharat Scouts & Guides ketdangsür senden ka menogo



Nagaland state aser Mokokchung district Bharat Scouts & Guides ketdangsürtem February 6 nü DC conference hall, Mokokchung nung densen amenba mapang tangokba noksa nung angur.

Dimapur, Tsüklai/February 6 (TYO): Nagaland State Bharat Scouts & Guides ketdangsürtem aser Mokokchung District Bharat Scouts & Guides ketdangsürtem senden ka February 6 nü Mokokchung DC Conference Hall nung menogo.

Iba senden ya State Commissioner (G) Nino Iralu lenisüba nung agi aser Deputy Commissioner, Mokokchung aser tir, District Bharat Scouts & Guides, Thsuvisie Phoji-i lokti pela agizükba o jembia liasü.

Senden nung State Organizing Commissioner (G) Vimi-i iba movement indang metetdaktsü aser

State Organizing Commissioner (S) John Thoshimong-i, school tem nung Bharat Scouts & Guides movement indang metetdakja liasü.

Kasa mapang nung State Trainer Commissioner (STC) Albert Solo-i, Training methodology aser Scouts & Guides movement nung hierarchy indang lemsatap.

Senden nungsa District Organizing Commissioner(S) Tovili Wati-i District report table süa ayu. Iba sülen district nung iba movement terenlok asoshi ken o balala benoka sensaksema liasü.

Wokha & Mon nung Civil Registration System training agi



February 6 nü Mon nung Births & Deaths' dak sendakba nung Online Registration training sentong agiba mapang tangokba noksa nung angur.

Dimapur, Tsüklai/February 6 (TYO): Nisung asoba aser asüba dak sendakba nung Online Civil Registration System training session ka February 6 nü DESO office, Wokha nung agiogo.

Iba sentong nung Chonbeni Oren Patton, ESP, Kohima shisalen sayur liasü aser district kübok yimtsüung balala nungi lenirtemi iba sentong nung shilem agia liasü.

Shisalen sayur aser master trainer-i, digital registration koda tongtibang iba indang

lemsatapba den tanüasüung lima koda kanga kar digitalized südar aser iba den menepetepa aintsü koda tongtiba iba dak rangloker tangazükba agüja liasü.

Laisa, civil registration inyakyim digitalize asüba indang metetdaktsü aser Nagaland nung online ajanga züngoksema ya 1% tekübok lir aser iba ajanga state ya tangar dang nungi kanga tekübokba jenjang nung toktsüogo, ta ashi. Anungji lai sentong nung shilem agirtem dang rangloker inyaktsü aser workshop nung

yakyaka shilem agitsü mepeshi.

Laisa, mezügbuba shilem tembanga inyakogo, ta metetdaktsü.

Sentong nungsa DESO aser deputy director R. Thsanso-i, tanga district den medemdanga Wokha district-i shilem tajung agiba atema tenüangsang agütsü aser training ya sorkar police tongtibang ka lir ta ashi. Paisa, User ID ya kechi aser iba yagi system nung kechi shilem agir iba indang metetdaktsü. Maneni pai, yimtsüung balala nungi iba sentong nung shilem agirtem dang kanga pelaba lemsatapba den parnoki iba training nung angazükba ta mapa küma benoka inyaksangshitsü imlaba lemsatap, koba ajanga senotsü aser mapang intoka jilai moi pei yimtsüung nungi dang mapa tembanga inyaktsü melatsü. Tatem nung pai parnok dang tetsükdaktsü kar danga ajangshira office semdangtsü mepeshi.

Iba sentong ya Jimmy Tungoe, IOS lenisüba nung agi aser DESO aser Deputy Director R. Thsanso-i anküp o jembia liasü.

Kasa mapang nung Department of Economics & Statistics, Government of Nagaland inyakyim nung shilem ka ama District Economics and Statistics Office, Mon-i ayongzüka Brehostibarnü Online Registration of Births & Deaths' dak sendakba nung training tanabuba shilem District Rural Development Agency (DRDA), Mon Conference Hall nung agiogo.

Training agiba nükjidong tongtibangtibaji digital registration system kanga junga amshitsü atema district nung Births & Deaths Registrars capacity tajungba kümdaktsütsü asoshi lir.

Economics & Statistics Officers, Dr. Tumbenthung Y Humtsoe aser Directorate of Economics & Statistics, Nagaland Kohima nungi Ingauleu Kenrang na shisalen sayur liasü.

Shisalen sayuri Births & Deaths registration streamline asütsü koda tongtibang iba indang aser Births and Deaths act of 1969 indang nükjidong aser Amendments tem aser iba

sülen ano 2024 küm benokba amendments indang metetdakja liasü. Nüburtem aser sorkar ajangzükdaktsütsü atema policy aser scheme tem yangluba mapang Births and Deaths registrations indang data nüngdakba indanga lemsatapa liasü.

Shisalen sayurisa technical session mapang online registration portal nung züngoksema yimya sayu aser manual registration melena online registration benoka inyakba indang metetdaktsü.

Sentong nung Registrars tem nem system amshitsü, data verifications aser inyakyim dak sendakba nung tangazükba agütsüba den Registrars tem dang data shitak agütsütsü mepeshia liasü.

Iba sentong ya District Economics & Statistics Officer, Mon Yhunchilo Khing lenisüba nung agi aser Economics & Statistics Officer, Mon Muyalu Kath-i, anküp o jembia liasü. Mon Districts nung Registrars ajak iba training sentong nung shilem agia liasü.



February 06, 2025 nü US nungi meindokba Gujarat nungertem Amritsar yimti nungi Ahmedabad airport tonga arudang tangokba noksa nung angur. February 5 nü US military tayimtsü ka nung India nunger 104 Amritsar tonga aru.

US nungi meindokba India nungertem tetsüing-teben ajak alena liasü

New Delhi, Tsüklai/February 06 (Agencies): Bodhbar nikongdang US sepaitem indang tayimtsü ka nung US nungi meindokba India nunger 104 Amritsar tonga arua liasü.

Ozüng alema US-i oa alir India nungertemji teimbaka Punjab aser Haryana na nungi liasü.

Brihostibarnü India nungertemji peipei jila tonga ogo.

Osangbener den jembidang Jaspal Singh-i, "Onok tetsüing-teben ajak alena liasü. Amritsar airport atongba sülen ang salatsü," ta metetdaksü.

Paisa, "Mezüngbo onoki, onok India-i anir aoer ta memeteti liasü. Onok camp kati anir aoer südi ta onoki bilema liasü. Iba sülen police ketdangser kati onok dang, nenok India-i anir aoer ta ashi," ta metetdaksü.

Singh-i, "Travel agent kati onok ashiokja liasü. Pai onok dang inyakim shidak bentshia US-i anir aotsü onok dang nangzüka liasü. Ni agent dang US visa anguba sülen ang ni US-i aotsü ta ashi, ajisüaka pai ni ashioktsü. US-i aotsü atema ni sen lakh 30 agüja liasü," ta ashi.

Jaspal Singh-isa, "Yaküm July ita nung ni tayimtsü ajanga Brazil-i anir ao. Iba nungjagi ni US-i anir aotsü ta ashi, ajisüaka agent-i ni ashiokja kangshia ozüing alema arrtsü adena anir ao. Ni Brazil nung ita trok liasü aser arrtsü adena US-i ao saka US Border Patrol-i apu. Yangji ni anogo 11 pua ayuba sülen kidangi meyipa yok," ta metetdaksü.

Brihostibarnü Congress lenir

Pawan Khera-i US nungi meindokba India nungertem tetsüing-teben ajak alena atema Modi sorkar dang tasüngdangba kaogo.

Khera-i X ajanga, 2013 küm UPA sorkar mapang nung US nung India nunger ketdangser Devyani Kobragade teka alener temang mita repranga liasü, saka India sorkari iba anemaji ola adokba agi US sorkari tatok meshitsüsa aküm, ta metetdaksü.

Khera-i, "India nungertem tetsüing-teben alener mezüngmeshia US nungi meindokba noksa ngua India nunger ka ama ni jashir. 2013 küm December ita nung India nunger ketdangser Devyani Khobragade America nung teka alener temang mita repranga liasü. Ibaji anema Foreign Secretary Sujatha Singh-i US Ambassador Nancy Powell den jembia liasü," ta ashi.

Paisa, "UPA sorkari ibaji sashia aitsü. Iba tatalokba anema Meira Kumar, Sushil Kumar Shinde aser Rahul Gandhi ama lenirtemi India semdanga alir US Congressional delegation (George Holding, Pete Olson, David Schweikert, Rob Woodalland Madeleine Bordallo) nunger ajurutsü memelung," ta metetdaksü.

Iba mapang nungji India sorkari US nem agütsüba maongka aika agien aser Income Tax department-i American Embassy mita ao.

"Tesüsa US ketdangser John Kerry-i India dang tatok meshi. US administration-i foreign secretary Sujatha Singh dangi call süa US-i sasaba lemsatapa

liasü," ta Khera-i metetdaksü.

Congress MP, Manickam Tagore-ia X ajanga, "Taoksatsüka aser taaksüka! US-i India nungertemji ozüing alema inyakertem ama tetsüing-teben alenbaji meimchir dak mapet aser magizükteter. Kechiba PM @narendramodi-i ola madoker? Asen nüburtem mezüngmeshiba nokdangtsü atema @DrSJashankar nai kechi inyakar? Tang ola adokang aser inyakang," ta metetdaksü.

US nungi meindokba India nungertem mejungi züngshiba anema Brihostibarnü Parliament kima opposition MP temi longkak aitogo.

Külen External Affairs Minister S. Jaishankar-i, US nungi meindokba India nunger dang junga bentshitsü atema sorkari US den jembidar, ta metetdaksü.

"Meindokba India nungertem dak tim mesüi mebenshitsü atema atangji onoki US sorkar den jembidar," ta Jaishankar-i metetdaksü.

Jaishankar-isa, "Ozüng alema linük balala nung alirtem tebilemtsü onük bentettsü atema anatsülen nungi jembishinütsü nüngdak," ta metetdaksü.

Paisa, meindokba inyakim ya tang tasen ka masü, inyakim nung tayimtsü nungi anir aoba mapang nung tenokdangbatem amshir, ajisüaka tetsür-tanurtem dakbo mebenshir, ta ashi. Taküm January ita nung Donald Trump-i US Tir tenangzüka agiba sülen US administration-i ozüing alema linüki arua alirtem mita ao tenzüka liasü.

Sorkari ajak senteper ajak renloktsü atema inyakar: Modi

New Delhi, February 06 (Agencies): BJP yimsüsüba kübok Centre sorkari 'Ajak longjemer, Ajak renloktsü' tangatetba nung inyakar, ta Brihostibarnü Rajya Sabha senden nung Ato kilonser, Narendra Modi-i metetdaksü.

Paisa, vote angutsü atema Congress-i mesüzükba politics asayar, ta ashi.

Modi-i, Congress party atema tongtibangtibaji "kibong tama" lir aser parnok mapatong ajakji iba nungji rangloker lir, ta metetdaksü.

"BJP atema tongtibangtibaji, linük tama. Ni ibaji nüma tangtanga shiteter. Küm 50-60 tashi nüburtem atema tanga lenmang kecha maliasü. Küm aika lir 2014 küm nungi linüki model tasen ka kulisüa nguogo, ibaji mesüzükba nung ajemdaker masü ajisüaka ajak melung asüba lir," ta Ato kilonseri ashi.

"Tamalen model, talisa Congress yimsüsüba kübok ajak nung temesüzükba liasü. Ibaji parnok atema tongti politics liasü. Parnoki telok tila kar nem langka agütsü aser karbo

sendok. Election mapang nung parnoki tiyazü nung teimla agütsü. Nüburtem ashiokja parnoki politics asaya," ta paisa metetdaksü.

Modi-i, "BJP-i aniba sorkari ali rongsen takok tashi amshitsü rangloker inyakar. Schemes balala ajanga teyari angutsüpur ajak ket atong, shinga mesendok aser teimla makai mekümdaksü. Tesüba küm ter tsüingda onoki level ajak nung 'Ajak senteper, Ajak terenlok' tangatetba nung inyak. Ibaji ajanga telangzübaji tang asenoki angur," ta ashi.

"Linük nung kin nung ajemdaker telemsa adokdaksütsü meranger. Küm 30 tashi House anaprongla nung party ajak nungi OBC MP temi OBCs atema Commission ka akhang, saka magizük, kechiyiyong iba mapang nungji ibaji politics den mapet liasü. Onoki OBC Commission atema temzüng kübok jenjang agütsü," ta pai metetdaksü.

"Tang mezüng onoki rongsenkettzüng tsütsü tesülen atsüngzüka aliba groups nem reservation shilem 10 agütsü.

Chandrayaan-4 mission ajanga ita nungi lung bener alutsü

New Delhi, February 06 (Agencies): 2027 küm India-i Chandrayaan-4 mission tenzütsü, aser ibaji ita nungi lung bener alutsü atema lir, ta Brihostibarnü Science & Technology Minister Jitendra Singh-i metetdaksü.

Chandrayaan-4 kübok LVM-3 rocket ajanga iba mission indang shilem pongu khakettsütsü aser orbit nung ibaji 'assemble' asütsü.

"Chandrayaan-4 mission nükjidongji ita nungi 'samples' bendentsü aser alimai bener alutsü atema lir," ta interview ka nung minister-i metetdaksü.

Paisa, sangküm Gaganyaan mission kübok India nunger astronaut tem spacecraft ka nung low-earth orbit-i yoktsü, ta metetdaksü.

2026 küm India-i Samudrayaan mission kübok scientist asem 'submersible' ka nung molu tzüyim (ocean) telunglen metre 6,000 tashi yoka tzüyim telung nung bushisüngdangtsü, ta pai metetdaksü.

Singh-i, yaküm Independence Day anogomong sentong nung jembidang Ato kilonser Narendra Modi-i Samudrayaan mission indang metetdaksüogo, ta ashi.

Paisa, Samudrayaan mission ya tongtibang minerals, kanga bulua manguba merang aser tzüyim telung nung taküm shiruru den süngolio balala bushisüngdangtsü atema lir;



item ajakji linük rongsenkettzüng aintsü atema tongtibang, ta ashi.

Indian Space Research Organisation (ISRO) ya 1969 küm tenzüka aser mezüngbuba launch pad amenoktsü atema küm 20 dak tali agia liasü (1993 küm amenok) aser tanabuba launch pad ji 2004 küm amenok, ajisüaka tesüba küm ter tsüingda India nungeri space sector nung tuluka inyaktetogo, ta paisa metetdaksü.



February 06, 2025 nü National Commission for Minorities Chairman, Iqbal Singh Lalpura-i Sambhal district nung Shahi Jama Masjid semdangba mapang tangokba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, FEBRUARY (TSÜKLAI) 07, 2025

Bendanglen Aayangertem

- Tangsen Lemtur

Kechi komaka südir süaka pei lima alibasa tajungba, ajisüaka pei lima pei tebok sünga alitsüsa mesüra pei nungdak peritsüsa mapa maongka manguba agi aikati pei lima toktsür bendang balala bushia oa alir. Pei lima nung nisung shia inyaksü mapa akatsüla aser taa angutsüla, ajisüaka pei lima mapa inyaka pei nungdak peritsüsa maongka mengutetba agi aikati bendang lima balala bushia oa aayanga alir. US nung ozüing alema oa alir India nung 104 meindoka February 5 nikongdang Punjab kübok Amritsar yimti tonga aruogo; ano aika meindoktsü. US nungi meindokba India nungertemji US sepaitem indang tayimtsü ka nung tetsüing-teben ajak chain agi alener anir aru aser Amritsar airport atongba sülen ang chain lisüji salatsü. Yaküm May ita tashi nung US nung alir India nung 97,000 apu. Parnok 30,000 shi Canada arrtsü nung apu aser 41,770 Mexico arrtsü nung apu. Parnok teimbaka Punjab aser Gujarat state na nungi liasü. Yakünü US nungi meindokba India nung karibo parnok US visa atema sen lakh 30-40 tashi agüja liasü saka 'travel agents'-i parnok ashiokja tim masüba lenmang ajanga US-i anir ao ta shiogo. Iba ya aika atema tansütsü lesson ka asütsü. Tang US nung ozüing alema oa alir India nung 7,25,000 shi lir ta asadangteter, anungji ano aika India-i meyipa yoktsü südi. Kobi melii India Prime Minister Narendra Modi-i US semdangtsü lia ozüing alema oa alir India nungertem US-i meindokogo, anungji iba ya ajanga linük ana tsüingda tesendaktep nunga kongshitsü südi. India nung aikati ozüing alema Mexico aser Canada arrtsülen adena US telungi aitsü merangbaji India sorkar atema-a maaksü, anungji tarutsü nungbo ozüing alema US-i aotsü merangertem nokdangtsü atema India sorkar teinyaksü mapa lir ta rajemer. India nung aikati pei lima toktsür bendanglen ang mapa inyaka linüba kuliji Centre aser state sorkartemi bushia mera tapet agia inyaksü mapangi sempeter. Ano külen shisadangra, India nung aikati mapa maongka tajungba bushia US, UAE aser Europe nung aliba linüktemi oa mapa inyaka aliba amaji asen Naga nungera aika mapa maongka tajungba bushia Delhi, Mumbai, Bengaluru ama yimti tulutemi oa peipei yari mapa inyaka alir. Pei lima nung mapa maongka junga manguba agi yimti balalai oa aliba nungji kecha tai mali, kechiyong tajangzük tuluba angutsü asoshi tanga yimtitemi oa maongka tajungba bushitsübjaja tongtibang. Ajisüaka tekümdangtsü kaji US-i oa alitsü jangrar India nungertem 'travel agents' nem ashiokdaksüba amaji asen Naga nungertema mapa mechi nung tzümar nem aiben ashiokdaksür. Tesüiba mapangtem nung Naga tsürtem kidang nungibo mapa inyaksü apuso, ajisüaka tangar nem ashiokdaksür lia kümzüka pei kidangi meyipa yokba tatalokbatem lir. Tanü lima nung mapa bushirtem jenti lir, yamaji mapa inyakdaksütsü atema nübo bushirtem-a lir, anungji mapa bushirtemi nübo bushirtemji junga metetba sülen ang bangjema telemtetba agitsüji tongtibang.

OLEMSABANG

AROGO TENZÜKBA ASER RONGSEN KETDANGTSÜBA

~ Wati Longchar (Eralibill),

(Yashi adok nungi...)

Amangbapur ajak Tenzüker ka ka

Baptist arogoi "amangbapur ajak putir ka ka" ta agizüker. Amangpur ajak - na aser ni - kongsa lidir, kechi inyakdir yangji Tsüngremi jatetba tenzüker ama taküm alitsü takhangba ka ta angatettsüla. Tetezü putiri dang masü (toklang tenzükertemi dang masü), amangba pur ajaki Tsüngrem indang ochi kulisüba nung shilem agitsüla ta sayur. Tsüngremi nungloktsüba tenzüka mapa nung, shiba dak sempet lir, shibai ochi nung tasü ita kuli süteter, shibai ni Khristaji kü kümtetdakba ta nangzükteter aser taküm bendanga agütsütsü mulungteter, parnokji pastor, deacon, missionary, mission board aser committee balala nung tenzükdaksütsüla. Kin-kidong, anük-apang, tzükong, yim, sector balala, tebur-tetsür ta masü, Yisu Khrista teyongtsü sūdaksür shibai liteter, pa/laji tenzüka mapa nung shimtsüla. Arogo nung pastor, ABAM nung Ex. Secretary, department balala nung secretary tetsür-tebur ta tebandang mali shimtsüla. Khrista züi alangzüka telok rongnung tetsür-tebur, tanür-tain, takar-sensaker ta tebandang mali, Khrista nung ajak kasa dang. Tenzüka mapa ya teburtem atema balaka wazüka ayuba masü, saka Tsüngrem nem bendanga agütsür atema ta metetdi. Ya metetdi: Tenzükbaaji Tsüngrem nungi tenzüker, aser tematiba Tsüngrem tajaba, anungji meimchir shingaia shinga Tsüngrem ochi kulisüba nungi nokdangtsü makok.

Hau, Baptist arogoi Tsüngremer temeshi mapa ana - Tzüsenba aser Kibuba Benjong - achaayangtsü atema tenzüker kar balala meshiteta ayur, saka parnokji temaba jenjang mapa balaka ta mangatettsüba. Ya Tsüngremer temeshi mapa inyaksü balaka meshiteta khuret agütsür ayuba aser ajaki temeshi mapa ta akhümtsüba inyaka mapa ka ta angatetdi.

Ano asenoki metettsüba kaji arogo ya building tajung ka süteta alibaji masü, mesüra tambur ishikati nüsüng ajunga asoshi telemtetba agiba telok ka masü. Project aika aser rongsen aika bank nung rizünga akabajia masü, saka timtemer yariba, samaa aliba pur tekümtet leman sayuba, aser lokti ajungkettsü tenyaba mapa balala inyaksü nungloktsü. Ibai Khrista dak amanger teloki kümtetba arogo. Ya sobaliba telok tentet ka masü nungji, aser sobaliba ozüing amshia azüoka ayutsüba telok ka masü, saka Laishibai kechi sayur iba amaji arogo tenzüka mapangren ajak bener aotsüla. Aji Lai khuli.

Arogo Rongsen ketdangsuba

Arogo rongsen kechi nungi arur? Ter shilem aser temoatsü tenla ajanga arogo maparen ajak ketdang sua bener aor. Ya Tsüngrem meyong aser Tsüngremi tenyaba mapa inyaksü tamangeri agütsür. Kodang tenzükertemi item rongsen timi ketdang mesulir, nuburtem tenzüker dang temulung malemer. Kechiba alimai arogo akhüm tsübur? Alimai ochiba tsübur. Tsüngremji ochi Tsüngrem lir. Iba ochi kimongji arogo tera yanger noktaka lir. Rongsen ketdangsuba nung ochi kuli mesütetra, arogoji tamentakdak lung laogo ta metettsüla. Arogo tenzükertemi rongsen ketdangsuba nung ochi kuli mesütetra, arogoji alima lokti tentet ka amai dang akümtsü aser sentepi aruner malitsü. Item lenir kübok arogo rajang akümtsü. Koba arogo nungsa arogo rongsen timi ketdang masüba ajitetra, iba ken-o mebentet tashi tenzüker ka mapa nung anena atatsüla aser tapet alima yimden, tat. agi, special committee, mesura FIR agüja shiba tai, shiba shitak aser koma metongshia ao nung tajungba asütsü telemtetba tajung agia arogo inyakyim akangshitsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yisu Khrista tenüng shidakbaji 'Yeshu Narazene' asütsüa akok



Dura-Europos, located near the village of Salihyah in modern Syria, was founded by the Hellenistic Seleucid Empire around 300 B.C.

February 06, 2025: Yisü tenüng 'Jesus' ya alima nung nüngtugutiba tenüng lir, ajisüaka Yisu tenüng chichibaji 'Jesus Christ' masütsüa akok, ta scientist temi metetdaksü.

Shisashirtemi ashiba agi, Yisu tenüng shidakbaji tanü-asüng asenoki amshiba nüngja ya masü saka Pai jembiba oshi 'Aramaic' nungi asütsü.

Atangji 'Jesus' ta asüba nüngja nung ojangtem karbo Par mapang nung tezüluba nung mamshi, ajisüaka Pa süadoker kodaki atuba sülen küm 1,500 shi lir dang item ojang amshi.

Khristan yimsü puti otsü küm 2,000 dak tema tsüngda Yisu tenüng chichibaji aiben meypzüka amshiogo.

Yisu tenüng shidakbaji Pai jembiba oshi 'Aramaic' nungi liasü, iba sülen Hebrew oshi agi meypzüük; iba sülen Greek aser Latin oshi agi meypzüük; tesüsa Aso 16buba mapang nung English oshi nung meypzüük, ta mongintemi metetdaksü.

Mongintemisa, atangji Yisu tenüng sülen amshiba nüngjaji 'Christ' masütsü saka Pa aliba jila nung ajemdaker nüngja ka amshi asütsüa akok, ta

metetdaksü.

Iba tetetzü Yisu tenüng shidakbaji 'Yeshu Nazareen' asütsüa akok, ta parnoki metetdaksü.

Yisu Khrista mapang nung Pai English oshi mejembi asütsüa akok, anungji English oshi nung 'Jesus' ta asüba tenüng ya mamshi asütsü.

Yisu aser Pa nütsüngtem Rome yimli kübok aliba Judea region nung ali, aser tang iba region ya Palestine aser Israel shilem lir.

Shisashirtem aikati, Yisu ya Nazareth jila nung intet ta bilemer.

Judaism aser Khristan yimsü tsüngda tesendaktep nung mongin aser Netherland nung aliba Protestant Theological University nungi Professor Dineke Houtman-i, "Yisu Khristai koba oshi jembiar asenoki tejangja memetettsü, ajisüaka Par kibong Nazareth nungi liasü, anungji Pai anogo shia jembiba oshiji 'Aramaic' asütsüa akok ta onoki amanger," ta metetdaksü.

Aramaic oshi ya tang 'Syria' ta ajaba linük nung poktet aser Yisu Khrista mapang nung iba

oshi ya Middle East tesem tulubaka nung prokshia liasü.

Iba oshi ya Yihuda nungertema aikati jembi aser anogo shia Yisui jembiba oshi ka liasü.

Iba dak alia tamalen Greek oshi nung adokba osangtajung kakettem nung Yisui jembiba olong karbo 'original Aramaic' oshi nung lir.

Ano karibo, Aramaic oshi nung Yisu tenüngji 'Isho' liasü ta bilemer. Iba ya Hebrew oshi nung 'Yeshu' mesüra 'Yeshua' version ka lir.

Hebrew oshi nungbo Yisu tenüngji 'Yeshu' ta amshi.

Ajisüaka Greek oshi nung Tasen Lai züluba mapang nung Yisu tenüngji 'Jesus' ta amshi. Aso 16buba mapang nung 'I' jagi 'J' melener 'Jesus' ta amshir.

Tatishitsü agi, Yisui 'Oba' ta asüba ya Aramaic oshi nung 'Abba' ta amshi.

Yisu mapang nung Hebrew oshi ya tongtibangsüa yimsü oshi ama amshi; yamaji Middle Ages mapang Latin oshi ya Khristan Arogo atema amshi.

Professor Houtman-i, Yisu-i Aramaic oshi jembiaka Pai Hebrew aser Greek oshitem-a meteta liasü südi, ta ashi.

Yisu Khrista mapang nung 'I' ojang ya maliasü, anungji Par mapang nung Pa tenüngji 'Jesus' ta mamshi, ta parnokisa metetdaksü.

University of Birmingham nung akhi Khristan yimsü nung mongin, Professor Candida Moss-i, "Shisashirtem aikati Pa tenüng shidakbaji Yeshua mesüra Yeshu asütsüa akok ta bilemer. Iba nüngja ya Aso mezüngbuba mapang Galilee nung kanga bulua amshiba tenüng ka liasü," ta metetdaksü.

Ajisüaka mongintem tang tashi Yisu tenüng den atongtepa amshiba nüngja kechi liasüar memetet. Asenoki 'Khrista' ta amshir saka Khrista yabo 'Messiah' mesüra 'Tsüngremi shimtetba' ta amshiba dang lir.

Laishiba nung 'Nazareth' nung Yisu' ta aiben amshia lir, anungji tangar dang nungi bendangtsü atema 'Yeshu Narazene' ta amshi asütsüa akok, ta mongintemi metetdaksü.

Mission Australia-i sorkar dang ki malirtem atema inyaksü mepishi

February 06, 2025: Khristan melungtet telok, Mission Australia-i, linük nung ki malir nütsüng aika kümдар, anungji parnok yaritsü atema inyaksüla, ta mepishi.

January 20, 2025 nü "2025 Report on Government Services - Housing and Homelessness," ta ser report ka sayaba sülen Khristan charity telok Mission Australia-i sorkar dang tang rongdak süa item nüburtem atema inyaksü mepishi.

Australia nung income ishika dang angur aser para kidang alir shilem 42 lir aser

parnok nisung pongu shia nungi anatibo ki para magütsüteni timtemer, ta report nungji shia lir.

Mission Australia nung CEO, Sharon Callister-i, "Iba report ya ajanga onoki lemsatepa aruba tebilemtsü onük jangjar. Osettsüset/ chiyungtsü nung jenjang kanga atuba ajanga Australia tesem ajaklen nisung aika talidak maka. Itasen angurtema aika tang mezüng talidak makai kümogo," ta metetdaksü.

Iba dak sendakba nung Callister-i sorkar dang Commonwealth Rent

Assistance atema senotsü shilem 60 tujang aser para kidang alirtem nem agütsüba subsidies reprangshiang, ta mepishia metetdaksü.

Callister-i, "March Federal Budget atongba mapang nung onoki sorkar dang National Housing & Homelessness Plan benoktsü mepishir. Homelessness Prevention Transformation Fund atema dollar sen million 500 lemozütsütsü aser taruba küm 20 tsüngda jenjang dalang agi ki angutsü atema ki million 1 sütsütsü mepishir," ta metetdaksü.

ANOGO ABEN TSÜNGREM DEN

TEMENEN RARATSÜ HATIR

Mosai nüburtem dang langzü, "Tetsübuma, ibai nenok temenen memenai Tsüngrem dang tashi anga alitsü atema nenok tendangtsü pa aruba lir. Saka nüburtemi ojita nung noktaka ata, saka mepet temelemdak kong Tsüngrem liasü aji anasabo Mosa dang ao.

~ Anitet 20:20-21

Tsüngrem tsübuba ya tamangertem asoshi kanga dang tajangzük tulu lir. Aser aji kechi ta süra, temenen tongpang koktetsü asoshi lir. Mosa mapang nung kodang nüburtemi tsüngpret preta tsüngmok amoka aser jangzü ola angashi aser mokozü tenem nung angu parnok tetsübu agi atentena talangka pila oa. Aser Mosa dang parnoki ashi, Pa ajanga dang Tsüngrem denji jembidakjang kechiaser Tsüngrem den tejak o tejak na jitepba jembi nungbo parnok süadoktsü ta bilem. Saka, Mosai parnok dang tetsübo ta ashi kechiaser parnok temenen nung metsüktsüsa Tsüngrem tashi angaa, Pa tsübua alitsü asoshi, aser parnok tamang tendangtsü aruba dang liasü. Anungji, iba tetsübu parnok nungi mepiladaktsüi anogoshia temeshiba taküm ka küma alima menentem nungi pila alitsü ajungshi.

Tsüngrem tsübuba ajanga, tashi angaba adokdaksür aser alima menen tatitang ajak nungi jenbua litetter. Tsüngrem tsübubaji asenok tamangertem asoshi menen tongpang raratsü nok-o-nü tajungtiba. Anungji Tsüngrem tsübua, Pai jashiba angaa anogshia alitsü merangdi.

Egypt nung Khristan ka jail nungi chiok



Abdulbaqi Saeed Abdo

February 06, 2025: Küm pezü tejaklen Egypt nung Muslim nung Muslim kati Khristan yimsü agizükba sülen pai iba osangji Facebook nung lemsatepba atema pa küm asem tashi tepuokdak ayuba sülen chiokogo.

Online nung Khristan tangatetba aser Islamic tangatetba onük nung o entepba nung Abdulbaqi Saeed Abdo-i shilem agiba sülen 2021 küm pa apu. Khristan group ka nung pai shilem agiba sülen pa pua küm asem tashi tepuokdak ayu.

International Christian legal organization ADF International-i ashiba agi, tanur pongu tebu, Abdo-i Islam yimsü toktsür Khristan yimsü agizükba sülen pa amokmerenba agi pai Yemen linük nungi jena ao Egypt nung jenoktsü atema United Nations High Commissioner for Refugees (UNHCR) dang mepishia liasü.

Abdo tepuokdak aliba mapang nung jail balalai

belenshia liasü aser tepuokdak alidang temelungjang, temesen aser tezüngjang nung timtem adoka liasü.

Pai pa tim masüba nung jail nung puoker, ta shia tesüiba ita 6 tashi pai jail nung lumia longkak aita liasü.

Pa tenüng nung ADF International-i UN Working Group on Arbitrary Detention nem temepishiba ken o ka agütsüogo.

Abdo'er jabaso, Husam Baqi-i, "Jail nung puoktsü mesüra tepsettsü atema tetsübu makai peii melungba yimsü amangetettsü atema temeden magütsüba ya tetsübütsüka lir," ta ashi.

ADF International nungi Kelsey Zorzi-i, "Tepuokdak alidang Abdo dang mejungi benshiba ya meimchir temeden alema inyakba lir. Ken o junga mangadangi mesüra pa tsütsülen nungi kuli mangadangi pa tepuokdak ayu," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Teindang**

(adj) temedong, tekirak masü (straight)

* Lenden lima nungbo gari lenmang ajak teindang lir.


Teinyakdak

(n) mapa nung nokdaka lir, tetenzükdak (incumbent, work in progress)

* Tang yimten mapa nung teinyakdak purtem kanga timatemer.



Tir Yimyim

OLONG PAITEP # 7057**TIPIEN**

2. Teburtemi tejak nung awaba - (8)
6. T _ _ _ em - (3)
8. Tzüik ayudak - (3)
9. Nüngdakba dang timba - (6)
11. Züina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 7056 TELANGZÜBA**TIPIEN :**

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden,
3. Kioktsü, 5. Lenti, 7. Tajangzük,
11. Teronem, 12. Sempa,
13. Jahaz.

NAI-A YA METETTER MA**2025 küm sayatsü asoshi ajaki yonga aliba smartphone ter:**

Samsung Galaxy S25 Ultra

iPhone 16 Pro Max

OnePlus 13

Google Pixel 9 Pro XL

Samsung Galaxy S25

OnePlus Open

Galaxy Z Fold 7

Google Pixel 10

iPhone 17 Air

iPhone 17

**Joykumar NPP Manipur unit interim tir kümogo**

Imphal, Tsüklai/February 6 (Agencies): Meghalaya Chief Minister aser National People's Party (NPP) national tir Conrad K Sangma-i, taoba Manipur Deputy Chief Minister Yumnam Joykumar, NPP, Manipur State unit interim tir asütsü shimogo.

Kasa mapang nung Manipur kübok Kshetrigao Assembly Constituency nungi MLA Sheikh Noorul Hassan, working president asütsü shimogo.

Iba osang ya Meghalaya nung amenoka aliba NPP

office, Shillong nung officially sangdonga liasü.

Manipur nung NPP menden trok lir (asür MLA N Kayisii-i toktsüba Tadubi Assembly constituency medeni) aser parnok taruba assembly session nung Congress MLA pongu den Opposition bench nung amentsü.

Wangoi Kh Loken tenüng nung nokdakba NPP MLA-i ashiba agi, party MLA tem party National lenirtemi lemtetba ama 12th Manipur Legislative Assembly session

tenetbuba nung Opposition bench nung amentsü. Assembly session ya February 10 nü tenzütsü.

NPP-i Manipur nung BJP-i aniba sorkar pu masemtsü atema 2024 küm November 17 nü telemtetba agia liasü.

Menden 60 agi kümtebba Manipur legislative assembly nung NPP pur MLA trok lir. Iba party yagi taoba assembly election nung menden tenet koka liasü.

Party MLA ka mapang talangka shiranga liyar süogo.

Mizoram SEC-i PWD Minister nem taitok agütsü

Aizawl, Tsüklai/February 6 (Agencies): Village Council (VC) aser Local Council (LC) election magi tsüngda model code of conduct (MCC) nung aibelenba atema Mizoram state election commission (SEC)-i PWD minister Vanlalhlana nem taitok agütsüogo. Election ya February 12 nü agütsü.

SEC-i, Vanlalhlana aser Labour, Employment, Skill Development, aser Entrepreneurship Minister Lalnghinglova Hmar na nem show-cause notices agüja liasü.

Opposition Mizo National Front (MNF) puri tashishiba ka benokba sülen tena nem show-cause notices ya agüja liasü.

Mongolbarnü agütsüba tetuyuba nung SEC-i ashiba agi, minister-i taitok meshiogo aser

**Vanlalhlana**

pai aibelenba nangzükogo aser pai pa indang office nungi social media ajanga video clip ka lemsatepba mapang pai MCC nung aibelener ta memeteti liasü, ta shiogo.

Vanlalhlana-isa, model code of conduct (MCC) anema inyaksangshitsü atema pa tebilemba kecha maliasü, ta

ashiba kasa sangdong ajanga metetdaksü.

"Ken o kanga junga asadangba sülen SEC-i pa nem taitok agütsüogo, kechiyong pai tang mezüingbuba aibelen menar liasü aser kasa aibelen tanaben memenatsü tenangzükba agütsüogo," ta kasa sangdong nung shia lir.

Minister dang video clip ya delete asütsü shiogo aser iba dak sendakba nung jenjang agiba anogo asem tsüngda metetdaksütsü tetuyuba agütsüogo.

Tanga tetuyuba ka nung SEC-isa, parnoki Hmar-i model code of conduct (MCC) anema inyaksangshiba kecha mangu, kechiyong pai sorkari inyaka aliba terenlok maparen balala rasa ashiba dang liasü, ta metetdaksü.

Manipur nung telungpur tesepe ana ngutetogo

Imphal, Tsüklai/February 6 (Agencies): Manipur Police commando aser central security forces tem longjemer meita aoba mapang Manipur kübok southern Kakching district nung Brehostibar anepdang telungpur tesepe ana ngutetogo.

Sepaitem yagi telungpur tesepe ana nung ya motor shells densema bomb, prangbong, injang aser tanga hadir balala ngutetogo.

Itangitertemi osang balala agütsüba dak ajemdaker Kakching district police commandos, Mahar Regiment,

Border Security Forces, aser Assam Rifles densema team kati Brehostibar anepdang 5 ako nungi tenzüka meita aoba sentong ka benoka liasü.

Meita aoba sentong ya Wangoo Mameiching aser Mongyaiching tesem nung benoka inyak aser iba mapang telungpur tesepe ana ya ngutetba liasü.

Meita aoba sentong ya 8 ako nung tembanga liasü.

Meita aoba mapang nisung ka danga mapu, saka prangbong injang aser bomb den tanga hadir aika ngutetogo.

Sepaitem ngutetba hadirtem rongnung single-barrel rifle ka, self-loading rifle ka den magazine ka, high explosive hand grenade ka, motor shells ana aser tozük gram 600 improvised explosive devices (IEDs) ana densema liasü.

Sepaitemi ngutetba prangbong injang aser hadirtem ya police nem bendanga agütsüogo aser temzüing ozüing dak ajemdaker jenjang tapet agütsü.

Police-isa, tatalokba dak sendakba nung ken o ka benokogo, ta metetdaksü.

**GOVERNEMENT OF NAGALAND
DIRECTORATE OF TECHNICAL EDUCATION
NAGALAND: KOHIMA**

NO.DTE/ESTT-2/5/2016-17**Dated, Kohima the 6h February, 2025****NOTIFICATION**

Applications are invited from interested In-Service candidates fulfilling eligibility criteria laid down below for admission to Degree Module course at North Eastern Regional Institute of Science & Technology (NERIST), Itanagar.

Sno.	Particular	Requirements
1	Branch/ Field	Computer Science Engineering/ Agriculture Engineering
2	Duration	3 years course
3	Minimum Qualification	3 years Diploma with minimum 60%pass percentage from the institute recognized/Approved by AICTE.
4	Maximum age	40 years as on 1 st August 2025. SC/ST, PH and Women 45 years as on 1 st August 2025.
5	Certificate of Undertakings	From the concerned Department that the candidate shall be sponsored for 3 years.

Selection shall be done purely on the basis of academic performance. Last date of submission of application along with all documents to the Directorate of Technical Education is on or before 15th March 2025.

(Er. VIPULHOU LHOUNGU)
Director

Longkak aiter temi Hasina'er ki rongdoktsü

Dhaka, Tsüklai/February 06 (Agencies): Bangladesh nung longkak aiter meyrirjang aika adenshia linük ngutetsang'er ki bensar rongdoktsü, kechiaser par jala aser taoba ato kilonser Sheikh Hasina-i la bhukumer dang tang aliba interim government anema nokdaksü ayongzüka social media nung o jembitsü liasü.

Hasina-i India nungi la bhukumer den jembitsü aliba ajanga Bodhbar aonung iba lendong ya atalok. Lai Bangladesh nung küm 15 yimsü süa arur kaketshiri anir lar sorkar anema nokdakba yong la taoba küm August ita kidanger linük nung oa jenoka lir. La anemertem lai ajemrepa ayu, ta la anemer temi aitsür.

Linük yimtiba Dhaka nung aliba ki ya Hasina tebu asür Sheikh Mujibur Rahman ki liasü, shibai anir linük ya 1971 küm Pakistan nungi nüchiso ngua liasü. Pa yangji 1975 küm tepset, Hasina-i mapang tatsüka lir iba ki ya museum kumdaksü.

Osangtem ajanga ashiba agi Bodhbar aonung longkak aiter nisung meyrirjang aika, kar süng, hammer aser danga hadir bener iba kima adenshi

aser kari ki abentsü crane aser excavator bener arua liasü.

Social media nung noksa prokshiba nung iba ki ya ajunga amai bensar liasü aser shilem kar okshia rongdoker liasü.

Bodhbar aonung ano Hasina'er Awami League bhukumer indang ki aser businesses nunga tenük yoker raksatsü, ta osang ajanga ashi.

Bodhbar aonung Hasina-i online ajanga jembitsü aliba nung tetsükdaksü agütsütsü mechi "Bulldozer Procession" tenüng agütsür rally ya ayongzüka liasü.

Students Against Discrimination telok den sendaktepa aliba longkak aiter aikati Hasina-i jembitsü aliba maginü, koba tawa tentetba interim government jazükba amai angatet.

Iba telok nung lenir Hasnat Abdullah-i media outlets dang Hasina-i jembiba meproksü tekumdangtsü ashi aser Bodhbar aonung Facebook nung "taonung Bangladesh ya 'pilgrimage site of fascism' talenba nungi salatsü" ta sangdonga liasü.

Arishi küm 18 tain kaketshir Mahmudur Rahman-i osangbener dang ashiba agi, "symbol of fas-

cism" tera dena makepteta indoktsü tim ta angateta longkak aitba nung aden.

Ano longkak aiter kati iba ki nokdaka alitsü kecha nüngdak mali ta ashi.

Longkak aiter temi India aija yimyim ayima liasü, kong Hasina ya taoba küm August ita Bangladesh nungi jenoa aoba sülen jenoka lir.

Bangladesh nung Nobel Peace Prize angur Muhammad Yunus-i aniba interim government-i Hasina yoktsü asüngdang saka India-i telangzüba agüja mali.

Longkak aiter aikati taoba küm la anema nokdak dang nisung noklang dak tema asüba atema Hasina nem temerenshi agütsütsü yimyim ayima liasü. Hasina-i United Nations dang iba mapang asü-amaba bushisüngdangtsü ayongzüka lir.

Ato kilonser menden nungi atsüngdoker alilai küm 15 yimsü asüba mapang ozüng agi memelai nisung tepsetba aser opposition tem ajemrepa ayuba tai tonglokja lir.

Bodhbarnü Hasina-i tekong meranga nokdaka "Parnoki ki ka raksatsütettsü, saka puti otsü bo meraksatsütettsü. Puti otsüi mapang ayangtsü," ta shia liasü.

World Health Organization nungi Argentina atsünginer

Buenos Aires, Tsüklai/February 06 (Agencies): Argentina-ia World Health Organization nungi atsünginer ta sangdongogo, anungji iba international agency nung mepetmesü tali akumer.

Parnoki Bodhbarnü sangdongba mesük United States-ia taoba ita sangdonga liasü.

Linük anaprong nung tang far-right administration ajanga yimsü asür, aser Argentina Tir Javier Milei ya US Tir Donald Trump den tesendaktep tajung lir.

Lenir anaprongi World Health Organization ajanga COVID-19 ketdangsüba aija liasü.

United Nations agency ka asünung sorkar dang par sülen anidaksü ozüng meyangluteter, saka pandemics ama public health crises mapang linük balala lungjemer inyaksü asoshi lenmang sayur aser research agütsür.

Ajisüaka COVID-19 pandemic mapang physical distancing atema World Health Organization ajanga ashiba Milei-i Bodhbarnüa tenüng sena liasü.

"Iba yongji iba ama tamakitsü lokti tentet yutsütsü onoki telemtetba agi, koba puti otsü nung lokti azüoktsü

asoshi tetendangba tulutiba agia liasü," ta Milei-i social media nung zülü.

Argentina nung osettsüset nung jenjang tali akumba mapang Milei ya 2023 küm tir akum. Pai iba sülen sorkari indokba ajemtsü mera agi.

Pai pa ya "anarcho-capitalist" lir ta ashir. Pa lenisüba kübok ita ka nungi ita ka osettsüset nung jenjang temlokba ajema kumaka Argentina indang poverty rate ya temaleni tua shilem 50 nung lir. Iba tebilemstü samadaksüba nung yaritsüla public services tem pai anentsü, ta pa anemer temi aitsür aser yangji sensakse nem chiyongtsü agütsüba soup kitchens asoshi senotsü teyari agütsüba dena lir.

2024 küm World Health Organization nem Argentina-i sen \$8.257 million shi agüja liasü.

Ajisüaka WHO yagi Argentina indang rongsenketzüng tebilemstü tamajungba kumdaksür ta Milie indang administration-i aitsü.

"Quarantines ajanga alima puti otsü nung rongsenketzüng tsütsü takoksa tulutiba ajuru," ta sangdong ajanga ashi.

WHO-i self-isolation atema lenmang sayuba kija ya meimchir anema mapa

tamajung liasü, ta Milei'er sorkari ashi.

"Ozü linük nung tanurtem school-i me yokba, mapa inyaker meyrirjang aika sen tarulen maka yutsübam businesses aser SMEs sentsütsür kumdaksüba sorkar ang WHO-i bhukuma nokdak, saka nisung 130,000 takum sama," ta sangdong ajanga ashi.

Milei indang sorkari WHO indang research nung tamang makaba shia liasü.

"Tanü kulitem ajanga WHO indang recipes agi mapa meinyak ta sayur, kechiaser parnoki science nung ajemdaker masü yimtenren tsütsü nungi reprang," ta sangdong ajanga ashi.

Iba mesükba ya Trump-ia January 20 nü totuyuba agüja liasü.

US tir ama kümsük tanabuba asoshi tenangzükba agir ghonda ishika lir Trump-i World Health Organization nung US-i senotsü teyari agütsüba anentsü executive order nung me yongnem agüja COVID-19 pandemic junga ketdang masü ta aitsü. WHO indang budget nung US-i shilem 14.4 mesüra sen \$1 billion jungnüa teyari agütsür. Parnok ainshiba ajanga WHO nung timtem jenti ajurutsü.

MULUNG NEN O



ASO: 24.05.1984 | ASÜ: 25: 01.2025

Temulung taroktiba, shisatsü aser tamang ajak agi ozü jabaso aser adianu asür **TAKOJUNGBA JAMIR (Mopungchuket)** den akümlima nung aliba mapang nungi pa den asüpila mapang tashi tamang sarasadem aser nübu agi yariteper ajak den O agi merajemtetba tepela lemsateper. Ozü asükhü anogo aser tensa mapang temulung ani mesüngzükteti aliba mapang nungja teta metenshiaka shirnokisa ozü mulung sünepja alimar tashi agi yaritepogo, ajak dang pelaba maneni lemsateper. Tematiba Tsüngremi nenok taküm maneni moajangma ta ozü sarasadem.

TETI TEMEIM
OJA, ADIANU ASER KINUNGER



OFFICE OF THE
ASANGMA SHISASHIR TELONGJEM

P.O. Tuli - 798618
MOKOKCHUNG : NAGALAND

TENÜNGSANG AGÜTSÜR



Asangma Students' Union ajanga Chubatoshi aser S. Atula na jala **Dr. Renemliia** nem tenüngsang agütsür, shibai St. Joseph University, Chümoukedima, Nagaland nungi Psychology and Counselling nung Doctorate of Philosophy ngutet. Lai züluba thesis "Occupational Stress, Burnout, and Subjective Health Complaints: Effectiveness of a Brief Mindfulness-Based- Intervention among Secondary Teachers of Nagaland," ya psychology aser education wadang nung shilem tulu lir.

Lai iba takok ngutetba atema Union tejak tenteter aser la tarutsü wadang ajunga nunga maneni takokba lidakjang ta moatsür. Lai maneni Asangma Village aser nübur asoshi konang tetushi maneni bener arujang ta sarasademtsür.

Sd/-
IMKONGLIBA IMSONG
(President AST)

Sd/-
TALIENLA
General Secretary AST

Gaza nung alirtem tesem danga nung lidaktsütsü khen atema dang: Rubio

Guatemala City, Tsüklai/February 06 (Agencies): US Tir Donald Trump-i Gaza nung alirtem tesem danga nung oa lidaktsütsü sentong yanglua aliba ya khen atema dang lir, ta Secretary of State Marco Rubio-i ashi.

Ibai US-i Gaza agitsü aser yangi aliba Palestine nunger million ana shi dangalen oa lidaktsütsü ta Trump-i jembiba sülen Rubio-i ashi, koba UN, human rights telok aser Arab lenirtemi aitsür.

Trump-i jembiba o ya White House odongtar Karoline Leavitt-i tali jangjashija, US-i iba tesem nung sepai yoktsü sentong mali, ta ashi.

Kasa mapang Israel Defence Minister Israel Katz-i Gaza nung alirtem iba tesem nungi ainshitsü aser immigration atema temeden agütsütsüla, ta ashi saka aji komasür inyaksü, ajibo

tejangja mashi.

Guatemala-i aodang, Trump sentong ya tamajunglen nungi masü saka temeim sayuba mera ka lir aser United States-i iba tesem yanglushitsü mulunga aliba sayur, ta Marco Rubio-i ashi.

Jana müreka ki o jen yanglushiba mapa inyakdang khen atema Gaza nung alirtem iba tesem yutsür aotsü atema lir, ta pai ashi.

International law kübok occupied territory nungi nüburtem tashiyim amshia tesem balakai bener aotsü merangba memelar.

Kasa mapang White House nungi Karoline Leavitt-i osangbener dang Bodhbarnü ashiba agi, tir-i Gaza yanglushitsü temulungtetba lir aser iba mapa inyakdang yangji alirtem khen atema tesem balaka nung yutsütsüba ashir, ta lai ashi.

Martinez yirur talangka masayatettsü

Tsüklai/February 6, 2025 (Agencies): Manchester United nungi asayar Lisandro Martinez, ligament yiruba sülen ano mapang talangka masayatettsü, ta club sangdong ka ajanga Brehostibarnü metetdaksü.

Taoba Deobarnü Premier League nung Crystal Palace goal 2-0 agi makokba asaya nung Martinez-i Ismaila Sarr ket nung ball rakzüksü merangba mapang yiruba sülen pa ground nungi anir tugua liasü.

Asaya tembangba sülen Manchester United head coach Ruben Amorim-i, pa kanga mejungi yiruogo ta ashi. "Pa kanga mejungi yirur alitsü ta bilemer. Onok atema aser talisa Licha atema iba ya kanga majung. Tang asenok ajaki Licha nem teyari agütsütsüla. Pai pa yiruba metetogo. Na asayar ka süra



kanga mejungi yiruba mapang metetatoker," ta Amorim-i ashi.

Temekok nung ligament yiruba ya aneptsü atema yimya agi ita tekushi agir, aser iba tetezü Martinez mapang talangka masayatettsü.

February 3 nü transfer window shibangba sülen tang pa yiruba ya club atema kanga takoksa tulu lir, kechiyong parnoki pa melener meshimtettsü.

Martinez kobika masayatettsü iba indang United-i kecha osang magütsü.

"Pa koma anepalu nung ajungtsü aser rehabilitation kobika agitsü aji jangjatsü atema tang pa yiruba asadangdar," ta United-i ashi.

Crystal Palace makokba sülen Amorim-i, Martinez ya team asoshi koda tongtumbang iba indang jembia liasü.

Martinez taoba seasona temekok aser tetsüng yiruba ajang anaben tashi mapang tatsütsü masayateti liasü

Argentina team taruba asaya March ita Uruguay aser Brazil na den World Cup qualifiers asayatsü lir. South American zone nung parnok temaba jenjang nung lir aser tanabuba jenjang nung aliba Uruguay team dang nungi point pongu agi timba lir.

Champions Trophy atema India nunger umpire kata mali

Tsüklai/February 6, 2025 (Agencies): ICC Men's Champions Trophy 2025 tenzüksü hopta ana anunga lia Bodhbarnü International Cricket Council-i, iba asayamung atema match official tem list sayaogo.

Pakistan aser United Arab Emirates nung February 19 nungi March 9 nü tashi asayatsü aliba asayamung nung India nunger ketdangsür ka danga densema mali.

PTI sangdong ka ajanga ashiba agi, ICC Elite Panel of Umpires nung züngoksema alisang Nitin Menon-i, jurila maparen kar aliba ajanga Pakistan nung asayatsü aliba Champions Trophy nung shilem magitsü telemtetba agiogo. "ICC-i pa (Menon) Champions Trophy roster nung inoktsünüa liasü. Ajisüaka pai jurila maparen ka aliba ajanga Pakistan-i maotsü telemtetba agiogo," ta BCCI cource kati ashi.

Match referee tem rongnung taoba mapang India nunger pacer Javagal Srinath-a tatembangbuba list nung densema mali, kechiyong pa leave agir lir. Srinath, shiba tang India aser England na ODI asayamung referee lir pai, "hau ni leave mshio,go,

kechiyong ni November, December aser January ita kidang nungi pilar senzüdar," ta ashi.

Pakistan nung Karachi, Lahore aser Rawalpindi aser UAE nung Dubai nung team ti asayatsü aliba asayamung atema umpire 12 shimogo.

Umpires tem rongnung Richard Kettleborough, Chris Gaffaney, Kumar Dharmasena, Richard Illingworth, Paul Reiffel aser Rod Tucker nunger densema lir shirnoki 2017 küma shilem agiogo.

Ano Michael Gough, Adrian Holdstock, Ahsan Raza, Sharfuddoula Ibne Shahid, Alex Wharf aser Joel Wilson nungera umpire tem rongnung densema lir.

ICC Elite Panel of Match Referees züngsem David Boon, Ranjan Madugalle aser Andrew Pycroft nunger referee asütsü.

Umpires: Kumar Dharmasena, Chris Gaffaney, Michael Gough, Adrian Holdstock, Richard Illingworth, Richard Kettleborough, Ahsan Raza, Paul Reiffel, Sharfuddoula Ibne Shahid, Rodney Tucker, Alex Wharf, Joel Wilson.

Match Referees: David Boon, Ranjan Madugalle, Andrew Pycroft.

Stoinis ODI asaya nungi anisüngzüker



Stoinis-i ashi.

"Ni Ron [coach Andrew McDonald] den tesendaktep tajung lir aser pai ni nongita yariba atema kanga pelar.

"Ni Pakistan nung Australia team pusema alitsü," ta pai ashi.

Pa asaya nungi anenba ajanga Australia team Champions Trophy atema renemshiba nung tetsükdaksü adokogo.

Captain Pat Cummins, bowler Josh Hazlewood aser all-rounder aser vice-captain Mitchell Marsh nunger ajak yiruba ajanga iba asayamung nung masayatettsüsa kümogo.

Australia team yanglutsü atema February 12 tashi mapang lir. Steve Smith aser Travis Head na nem captain mapa bendaktsütsü atema asadangdar. Iba asayamung ya February 19 nü tenzüksü.

Leg-spinner Tanveer Sangha, all-rounders Sean Abbott aser Cooper Connolly, batter Jake Fraser-McGurk, aser left-armers Ben Dwarshuis aser Spencer Johnson nunger taruba hopta Sri Lanka den ODI asaya atema team nung züngoksemogo.

Stoinis shiba T20 asaya nungbo Australia tenüng nungi asayatsü, pa 2015 küm mezüng asayaba sülen ODI 71 nung asayaogo.

Pai run 1,495 yanglu aser pa indang average 26.69 liasü. Pai run timtiba yanglubaji 2017 küm New Zealand den asayaba mapang out mesüi run 146 yangluba ya liasü.

Paisa, wicket 48 agiogo.

"Linük tenüng nungi temaba jenjang nung asayatetba ya ni teti menungra bilemtettsü," ta paisa shisem.

Windies-i kidang asayamungtem sangdongogo

Tsüklai/February 6, 2025 (Agencies): West Indies-i 2025 küm kidang asayatsü aliba asayamungtem sangdongogo, kong Australia den Test asayamung ka asayatsüba densema lir.

2015 küm tatemsa Australia team Caribbean nung oa Test asayamung ka asayaogo aser küm ter sülen taküm asayaba angutsü.

Iba asayamung ya ICC World Test Championship cycle nung shilem ka asütsü, koba Lord's nung 2025 World Test Championship Final asayaba sülen anogo ishika lir June 25 nü Barbados nung tezüksü.

Asaya asem asayatsü aliba Test asayamung ya Barbados, Grenada, aser Jamaica nung asayatsü aser iba sülen India aser Sri Lanka na nung 2026 küm asayatsü aliba ICC Men's T20 World Cup atema

renemshitsü asoshi T20I asaya pongu asayatsü.

Australia-i semdangba sülen West Indies-i ayongzüka Pakistan den ODI asem aser T20I asem Florida aser Trinidad nung asayatsü renema lir. Tebur team ya ano India (Tests ana), Bangladesh (ODI asem, T20I asem), aser New Zealand (Tests asem, ODI asem, T20I pongu) nungeri oa asayatsü lir.

Kasa mapang nung Hayley Matthews-i aniba West Indies tetsür team Women's Cricket World Cup Qualifier ajanga ICC Women's Cricket World Cup atema qualify asütsü merangtsü.

Qualification asayamung

atema anogo melateti lir, saka West Indies team India nung asayatsü aliba 50-over World Cup atema team ana shimtsü aliba rongnung densemstsü merangtsü. Iba masüdag tetsür team England den May aser June ita white-ball asayamung ka nung asaya trok asayatsü aser iba sülen kidang South Africa den asayamung ka asayatsü.

Mapang talangka nungi yongya ataba sülen Australia team-i WI semdanga format ajak nung asayatem asayaba ajanga West Indies team nem ICC asayamung tongtibangtem atema renemshitsü asoshi maongka tajung agütsütsü.

BILEMDANGANG

"Timla samara ajak samatsü."